



張捷明

尿桶角个蕭將軍

得獎感言

吾胞衣跡在大山肚，自細時無電視好聽風搓消息，乜無放麼个風搓假，逐日天盲光就愛打赤腳行山路去讀書，莫講出日頭毋驚熱，乜毋驚落大雨擎芋荷，就算風搓來風合雨，又乜戇戇仔煞猛行，一路看大樹尾裁天挖雲、看飛葉傷人，看風搓回南擲起大樹。

再看著這下人麼个屁卵就毋知，淨知見風搓就吵愛放棄，佢講分後生人聽，佢兜講佢講古。佢又想起小學時讀過个課文〈納爾遜將軍兩兄弟去讀書〉，故所佢講咁這個古。



尿桶角个蕭將軍

這係一座山城圖畫，四片有層層疊疊个大山、對中(dung')个平洋¹禾黃米白²。

天頂徙來徙去个白雲同³飛來飛去个鷓鴣做伴，飛高高个鷓鴣目珠利利看天下，看著大山肚有一條山溪水，彎彎幹幹流流流流⁴緊流緊大條，等流到平洋既經係大河壩，大河壩脣有橫橫直直个田坵，同點點屋舍，田頭田尾、水頭水尾都有伯公，還有幾間寺廟，鷓鴣來這巡山巡河壩，會拖蛇哥、捉老鼠，成下還會打雞子。

這平洋盡打眼个係對中有一搭細街市，街市肚有一間小學校，學生仔大體歇在平洋就近，乜有一息係大山肚个細人仔。

這一日，下晝第四節課个下課鐘聲既經敲響，五點咗，認真个三年級級任先生⁵臥頭看一下窗門外背，天時就會暗分咗，就幹轉頭交代：

「天光日个國語課文愛教『納爾遜將軍』，轉去先讀一遍，佢看麼儕盡煞猛，會加分。知無？」

這係級任先生交代个家庭宿題⁶。

佢係後生个細妹先生，本成係大街市人，正搬來這莊下學校教書，係三年級盡認真个先生。

「知～」

大家擲長頸根相爭應。

「當好。班長！下課。」

「企起來、敬禮！」

「先生恁仔細！」

細人仔一個一個正行出教室，又拍拍風在教室外背一聲一聲相賽⁷喊：

「天光日愛讀『尿桶角个蕭將軍』耶！」

「哈！哈！」

又向教室喊：

「尿桶角个蕭將軍～遽个啦，佢兜在校門口等你喔～」

「姓張姓謝莫姓蕭，寫隻蕭字愛半朝，將軍～若蕭字寫好旨啦！仰會恁慢？！」

「哈！哈！哈！」

看等該群細人仔緊行緊講笑，先生聽著乜嘴角翹起來。

「這兜調皮个細人仔，恁得人惜！」

到這下，先生正有閒合起課本臥起頭，看等臨暗仔西片天个彩霞紅咚咚⁸，一支一支个紅梗同青梗⁹，在日頭下山个位所為圓心，像孔雀鳥个尾，放勢牯¹⁰開¹¹開來，同彩霞層層疊疊，將既經會暗分个半片西天，打扮到靚靚。

佢怙怙仔欣賞天邊美景，耳公又聽著教室盡後背還有一儕撻凳仔放到書桌下个聲，佢一看，就係頭下細人仔喊「尿桶角个蕭將軍」該隻蕭順興。

「蕭順興，仰毋較遽兜仔轉？」

「吾姆講，債多毋使愁，路遠毋使趕。」

「加一下就會斷烏咗，仰毋使趕？若姆敢係恁樣教你个？」

蕭順興生到高溜高溜白淨白淨，先生毋識問佢做麼个厥外號恁生趣，毋過識聽共班个細妹同學講，怕係佢比同學較高溜，瘦羌瘦羌像竹篙，身高可比城隍爺廟肚个七爺謝將軍，大家正撻佢安外號「將軍」。

毋過，佢高係高，並無盡砸礮，讀書个頭腦乜無盡精光，做麼个就趕，行路乜趕，無麼个會講國語，校長規定愛講國語，係講方言愛罰，毋過蕭順興講國語舌嫌會打結，來學校就像出國，驚罰錢，將就怙怙像啞狗，趕趕像條蟲，就怕係恁樣，厥爺哀正分佢慢一年入學，又年尾人¹²，足足大共班同學兩歲，乜好得恁樣，大牯雞慢啼，頭腦正有較即靈兜，跔得著大家。毋過下課後，係同佢講客，頭腦又一下魂醒過來，捩捩轉像條龍，訥嘴相罵全批佢毋著，跋樹仔還打第一，同學笑佢：

「欸？狗上樹毋成猴啊！」

「佢係將軍，本成就毋係猴仔。」

本旦，一班既經六十四儕，堵好分八排，一排乜八儕，八八六十四，堵堵好排八卦陣，多出佢一儕，就安排坐到盡後背兼壁角个位所，就係六十五號，坐在該隻角，看一班八八六十四卦个八卦陣，連班長就在八卦陣肚歸佢管，確實像一人之下萬人之上个將軍布陣。上課時節，任何一隻同學个一動一靜、一搖頭一爪癢，全看到在厥目珠頭，佢同講臺頂高个先生，兩儕鼓

扛等來打¹³，一儕在頭前做元帥，開聲指揮；一儕在後背做將軍，恬恬靜靜壓陣，爭就爭在，元帥看著个係八八六十四對認真个目神，將軍看著个係八八六十四粒背對佢个腦之背，六十四粒腦之背全無生目珠，故所全無人搭佢，除忒講臺頂个先生。

先生一對目珠像利箭，成下會掃過來，佢知，利箭毋係眼箭，成時細妹仔會同佢打眼箭，眼箭係軟絲箭，會從若目珠撓¹⁴入若心肝，厥爸講，眼箭愛用眼拐去制，佢就用打眼拐去勾打眼箭，緊勾緊好搞；毋過利箭像竹修仔，掃著皮會痛，故所佢毋敢啄目睡。

上課無人搭佢無相干，佢自認該隻角頭就係將軍角，佢就係將軍——蕭將軍。細佬同學較調皮，講該隻角其實係尿桶角，故所「蕭將軍」就自動升官變做「尿桶角个蕭將軍」咁。

「係啊，路遠毋使趕，係吾姆教个，吾姆講，上山係比韌力，毋係比遽，勻勻仔緊行，肯行總會到屋。」

「忒慢轉到屋，若爺哀毋會愁？」

「行遽行慢，轉到屋橫直都係斷烏，忒早轉去還愛搨手割牛草。」

「難怪你逐日上課就遲到，赴毋掣升旗典禮，天光日愛早兜來喔。」

「好斯好，毋過恁遠，任遽乜遽無幾多。」

「有幾遠？指分佢看？」

「吾手又無恁長，指又看毋著！講又講毋清楚。」

「該你試講看仔。」

「校門直直出去到街尾，差毋多牛仔食忒三紮牛草¹⁵个時間，就會行過三板橋，再彎左片，行過牛屙一堆尿个時間再幹右片，經過孩擔一轉肩个所在，該位有三間屋，再過忒牛仔打屁卵个一站路程，就岔右片上山，緊行緊

看，行瘡地，有茶崗¹⁶就寮一下食口茶，無茶崗就自家屎脰撥撥仔，地泥下罔坐，等眨過大崙後看著一搭窩湖，下崎上崎彎彎幹幹就一條路，跔等緊行就好，山肚無時鐘仔，乜毋知愛算幾多時間，有路就行，無路就寮，轉隻幹自有出路，堵著雲就雲做伴，堵著山猴仔就莫搭佢，總會轉到屋。佢樣有詳細無？」

「哦！盲愛正，盲愛正，仰般講『自家屎脰撥撥仔，地泥下罔坐』？毋係愛撥地泥正著？」

「意思就講，毋使佢淨俐，地泥下本旦就係泥粉，無撥無相干，係佢愛淨俐，跔起來正自家屎脰撥撥仔就好，這條吾爸講反話啦。」

「該牛仔打屁卵个一站路程？又仰般講？」

「就一下仔啊，該無你講，打一粒屁卵愛幾久？毋過，牛仔佢大隻，打屁卵會較久兜仔啦，吾叔伯阿哥逐擺就講，寒著熱著食厥屁卵一等好，吾爸就講『屁卵晒燥無層皮，毋當薑嫲兩三皮』。先生！有聽詳細無？」

「詳細係有詳細！就係毋好緊講屁卵啦。還有，你一下講佢多彎彎幹幹，佢記毋擎△¹⁷。佢問你，你一個十歲子仰會講這兜指路个話，係麼儕教你个？」

「係吾爸教佢个啊。佢一年生入學第一日，吾爸帶佢來學校報到，交分先生後，就佢樣教佢轉屋个路，佢講佢還愛遽遽先轉去山頂做生事¹⁸，無佢多閒工好閒核跔股碰，就留佢一儕在學校，到下課正自家轉屋，好得還有大大細細个讀書伴帶等，行幾擺就記得地，路項佢兜堵著揚尾仔就用手拈，堵著草蜢就擎竹修仔打，拈揚尾打草蜢當好搞喔。」

「唉唷，若爸仰會講『髒話』啦！毋好佢樣講。」

「麼个安到『髒話』？」

「『髒話』就係該兜厝糟罵人个了少話，就像頭下你講該麼个『閒……』麼个『……碰』啊！」

「哦！就閒核跔股碰該句係無？係毋好佢樣講？該又愛仰般講？鳥仔同鳥寶肚好好个鳥卵，扞等飛來飛去無閒直掣捉蟲仔？該就係噴飽忒閒啦。再

過講，核卵毋會屙糟啊，吾爸講細俵仔做盡有核卵，這係大家就知个，連吾姆係細妹仔乜知，佢四歲該下洗身，吾姆就講核卵自家洗。佢第一擺自家轉屋毋敢行山路，緊噉眊，吾爸還罵佢細俵仔無核卵係無！害佢愁忒半下晝，該暗晡洗身佢自家緊看，好得一付一當全部本本還在。」

「好啦！好啦！莫再講『卵』、講『碰』。該恁樣，天光日禮拜六上半日課¹⁹，先生正趁你轉去若屋下家庭訪問，喊若爸分你較多兜仔時間讀書。」

「好斯好，該先生你愛先食飽晝正來喔，毋係吾爸毋請你食晝，係吾爸講，街市人行路上山當熨斗，會瘡又會肚飢，到時山路項無點心店，盲行到半路，街市人就會打頓屈²⁰噉眊。毋怕，等來到吾屋下，吾姆正刷隻雞仔，再煎雞春，就有雞脾同雞春請先生食夜。」

「佢敢係軟腳蟹蹶毋贏？」

「佢看，先生莫逞強正好，毋怕啦，佢同黃阿明都會摻先生做伴慢慢行。」

「毋過，雞春又係麼个？」

「頭下先生毋係正講過，毋好緊講『卵』，講『卵』係屙糟罵人个了少話？吾姐婆講，雞春²¹就係從雞嫲屎肚空屙屎該位哼出來圓圓个東西啊，一日哼一粒，兩日屙一雙，吾姆講雞春盡補，無人客來還毋盼得煎來食呢，講愛留來孵雞子。先生毋使愁，佢會同雞春洗到淨淨俐俐毋會著(dauˋ，沾)著雞屎，半息就毋會屙糟，煎好个雞春，幾香仔你毋就毋知哦～包準先生食到會尋尾²²。」

「好啦好啦！佢知雞春乜，毋好又緊講『屎肚』、『屙屎』、『著著屎』。毋過，該雞仔又毋係你畜个，你仰般代若姆應承愛刷雞仔請先生？」

「吾爺哀識講過，一等人正會做先生，請一等人食飯一定愛刷雞捋鴨仔正有誠意，再過講，佢平常時乜有搨手餵雞鴨，吾姆刷雞鴨佢乜會搨手捉腳，搨手擲毛，乜有吾誠意呢！」

「頭下同你講笑个，毋使刷雞仔啦，去一下就愛轉來，有一杯茶食嘴燥就好，下晝轉來還有安排幾下儕同學，共樣愛家庭訪問。」

「毋過先生，照佢看，到斷烏你敢怕還言轉到屋呢？毋怕，暗地，就在吾屋下歇²³一晡，禮拜日打早佢正渡你下山，係無人渡，佢驚你昂山²⁴撞差路²⁵，又驚路項有茫神仔。」

「毋好緊嚇先生啦。」

「過地，天光日愛帶水衣仔²⁶喔，怕會落雨。」

「麼儕講會落雨？」

「吾爸講个，佢講青梗晴，紅梗雨，你看這下个天頂一條青浪、一條紅浪，該就係青梗紅梗，青梗紅梗加滿天紅，毋係雨就係風，盡驚風合雨。」

「又係麼儕同若爸講个？」

「會知！？就知佢見講見對。」

蕭順興話頭一拉開就講到一條線，教室外背一個矮佻佻个同學行倒轉來追佢好轉：

「尿桶角个蕭將軍，好言？龜仔就趕到屋地，你還在該摸麼个？愛攞你換名『磨疏²⁷將軍』哩。」

「好啦！」

同這個蕭順興講客實在有生趣，佢來學校像出國，毋知仰般開嘴講國語，下課又像轉國，一擘開嘴講客，就像變奇術，講毋會煞，應對又老郎²⁸，連佢做先生个，就怕毋當這十歲子。

先生又問加一隻問題。

「若屋下有laˊji loˊ²⁹無？」

「麼个係laˊji loˊ？」

「無啦！遽个好轉。」

矮佢佢个同學又追佢：

「磨疏將軍，好旨？」

「好咁啦！佢緊性做麼个！」

「會斷烏咁啦！」

「時到時當，無米正來煮番薯湯。」

「老師再見！」

矮佢佢个同學較會講國語，跔等就「老師再見！」斷(donˊ)忒將軍个興頭。

「先生正來寮！」

將軍高不將正同收起該話尾，打隻話結。

有七爺謝將軍，就有八爺范將軍，這隻矮佢佢个共班同學就係外號安到八爺將軍个黃阿明，莫看佢矮罔矮，腳肯徙，頭腦即靈，手腳真緊板，同蕭順興係上下屋人，在班仔項坐盡頭前兼前門个位仔，就係第一號，兩儕好到掙泥毋洗手³⁰，褲帶頭結共下，像一對聖笏仔，逐擺就共下上課、下課、轉屋。

「遽个啦，跔伴毋著，又愛打暗摸地。」

「毋會啦，佢腳恁長，蹠一步就分你走兩步著！」

「暗晡頭驚鬼。」

「大家就喊偲兩儕係七爺八爺呢，又毋使驚鬼，怕麼个？」

「暗摸胥疏，驚怕跌到崩崗下！」

「崁下一枚針，拈來送觀音……」

無講無笑(xiau)仰得過坳³¹，兩儕人一路咚咚咚咚³²駁嘴古³³，就毋會緊注意等路頭還幾遠……

第二日禮拜六，升旗典禮正過，天頂真緊就轉烏陰，教室个電火珠仔愛省電，還毋盼得杓著³⁴，有一息仔打暗摸³⁵，教室外背跔等就落雨毛屑仔，接等又開始起風，尤其看轉東片山个崑頂³⁶，早就雲緊走風緊滾，大山肚个雨既經落到烏天暗地浩洪斗雨，先生想起蕭順興厥爸講个「青梗晴紅梗雨，青梗紅梗滿天紅，毋係雨就係風，盡驚風合雨。」無成，厥爸正經比氣象臺還較厲害，見講見對！？算來蕭順興厥爸有讀書抑係無讀書？係有讀書，仰般講話恁粗？細妹人強強會聽毋入耳，係無讀書，仰般又比氣象臺還較厲害？

到第一節上課點名个時節，該蕭順興黃阿明還言到學校，先生當愁慮。

「大家掀開『納爾遜將軍』這課，先認真自修，先生去校長室行一轉。」

「校長，看起來像風搓？吾班仔還有兩位同學言到，愛仰結煞？」

「唔！無法啊，又無哪好連絡起。毋使愁慮恁多啦，天生天養，山頂人家當有生活經驗，會自家保護自家，無定著看著雨恁大，還在屋家。」

「毋過，細人仔正十歲子，係行到半路仔正堵著風雨愛仰般正好？你有 laˋji loˋ 無？聽看仔係毋係風搓？」

「昨暗晡有聽，講係細風搓定定，毋過無講恁遽到啊！？」

「該加一下風搓吹到學校來，大風大雨愛仰結煞？愛先分細人仔先放學轉屋下無？」

「風搓來正喊細人仔先放學轉屋，路項顛倒毋妥當，在學校掌等讀書較安全，就續等上課啦！」

「菩薩啊，請保佑細人仔好無？」

這個新來个級任先生，愁勞博激，續下來嘎毋知該節課係仰般過忒个……

「這下先來上國語課，麼儕有先讀過个，做得企起來講課文大意寫麼个無？」

「佢！佢！」

有幾下儕擎手，班長係其中一儕。

「班長你先講。」

「頭擺英國有一個當偉大个人，安到『納爾遜』，有一擺佢同厥哥兩儕愛去學校讀書个時節，半路仔竟然落大雪，厥哥講風雪恁大忒危險，偲在屋家自家讀就好。毋過，納爾遜毋驚，佢講仰做得為著一點細細个困難，就來驚燒怕冷打卯退呢？偲該當較煞辣个去學校讀書。納爾遜就係恁樣毋驚困難个精神，下後佢就成為英國个大將軍吔。」

「當好當好，有認真。」

「佢昨暗晡用兩點鐘个時間來讀，有兜『生字』還先問吾爸。」

先生緊想等該兩個細人仔，無注意愛阿腦一下，同學乜乜鼓八笛開始打嘴鼓。

「班長班長，你還慶哦，毋過，麼个係雪，仰會恁得人驚，連將軍个阿哥就驚？」

「仰毋得人驚，佢問吾哥，吾哥聽講雪當重，連屋仔就會砗塌底，『納爾遜』將軍係堵堵在屋肚，就會分雪砗死，你講，雪得毋得人驚！？」

「若哥看過雪？」

「有，在月曆項有圖片，雪還會像孫悟空共樣七十二變，變雪人！係捉起來關到籠仔肚，等日頭一出來又會變毋見，你講，有厲害無？」

先生心思放在該蕭順興、黃阿明身項，嘎任在細人仔訥嘴。

一直到第二節上課，本本無消無息……

…………※…………※…………※…………

蕭順興、黃阿明兩儕外號七爺八爺，該係同學搞笑號个，嘴講毋驚鬼，係正經堵著鬼，怕走到比麼儕都較遽，尤其驚該毋係神毋係鬼个風搓，除非有戇膽。

蕭順興厥爸講个的對³⁷，該日確確係風合雨³⁸，準準³⁹。一粒細細粒个風搓，從天邊海角拉等風帶等雨，環車舫斗輾過千重山，緊拚拚仔掃一路來。

毋過，莫看輕細風搓，細罔細，矮凳仔乜會徑死人。

本旦山頂个細人仔，平常時讀書，無論係晴朗抑係落雨，書包仔肚定著會帶一坭薄薄仔个水衣仔，該係四四角角个一坭打眼黃色。

「阿爸，又無落雨，毋使閒核跔腩碰，帶等耗位所啦，係落雨正擎芋荷葉。」

「厥姆佢正好，恁會堵嘴，這下喊你帶等就帶等，係落大雨，俚斯毋會好好个核卵割下來攞，正跔跔拿去分你喔。」

厥姆看佢兩子爺一句來一句去，趕緊來勸話細人仔：

「晴天防落雨，莫待雨淋頭，頭擺人平常時無恁輕个東西好隨身帶等，落雨愛著重鉤鉤个蓑衣，臨時臨及落雨正會擎芋荷，這薄薄仔摺好勢毋會幾霸位，落大雨就毋使求天，落細雨乜毋使拗芋荷。無成你愛等落雨正來涿狗仔⁴⁰？」

蕭順興勸厥爸毋贏，就聽厥姆个話，故所書包仔肚項，不管時定著會帶等打眼个黃色水衣仔。

這朝晨蕭順興、黃阿明兩儕打早湊等就出發，天色比往日較暗，天頂烏陰烏陰有一息雨毛屑仔。

「會落雨喔，看有帶著水衣仔無？」

「有啦，一息雨毋怕，又毋係羊咩咩。」

兩個細人仔打開柵仔門就出發去讀書也。

「唉～腔寶係無？驚燒怕冷下二擺做麼个濟事⁴¹好！」

「本來就係佢身下落个身項一團膾寶肉啊，佢毋愁愛麼儕愁，你男仔人淨知樂線樂線做阿爸，知麼个做人阿姆个心焦。」

「佢犁田委種掌草乜汗流脈落，耕田合耕圃，做到兩頭烏，你知麼个男仔人出力幾辛苦。」

細人仔就毋知行到哪去地，厥爸厥姆還在該駁嘴。

毋過這朝晨，歸粒風搓正經就從東片徙一路來，風搓係一隻倒捩个時鐘仔，座盡頭前先交(kau´)个係北風。

兩個細人仔正蹶上風吹牛鼻頭⁴²个窩湖崑，好恬恬講風係風，講雨就雨，風合雨共下罌下來，兩儕遽遽拿出黃色水衣仔，先拉等兩隻角頭同頭那，再揩兩片嘴角對揩到蛤蟆脰，兩隻角頭又交叉縳到頸根後背，歸隻人看起來就伸兩粒目珠看路，黃色个頭那同一身黃色个披風，認毋出麼儕係麼儕。

毋過，這下係風搓雨，有水衣仔乜奈毋何，下載分風撥到獵獵滾，緊拉、緊扯，無兩下半就分風扯斷，黃阿明手腳緊，出手一拉，拉著頭截，尾截本本奮斷，跔風飛上樹尾纏著，伸著縳到頸根項包等頭那該半截，還有手項抓等走毋利个一細埕尾。

黃阿明呆在該，毋知愛仰般同厥爸交代，這錢買來个水衣仔。

該蕭順興手腳慢，還較難，水衣仔下載分風拂斷該下，想就還妄想著愛拉，一大截就飛上天，無挽著樹尾，從目珠頭看等佢又再飛上天，緊飛、緊滾，飛到濛線，毋知哪位去地，兩手空空。

「驚滌咩，搭得佢幾大雨，溼就溼透咗，任涿乜毋會加較潦，毋怕啦！」

連企到大樹尾个老鵠婆乜涿到一身潦潦，莫看佢平常日上天落地恁威風，這下風搓來，莫講飛毋贏風搓，連厥鵠婆寶乜分風飛走，看佢企在樹尾，腳爪抓核核跔風搖，恁堵好，厥目珠看著斷到半截个黃色水衣布，飛過厥目珠頭，又纏著樹尾飛毋走，佢記好位所，想講等風搓回南⁴³過後，正去啣轉來整⁴⁴寶，另外該還較大坵个，橫直恁打眼，這片山又係佢个地盤，正來慢慢仔尋，顧好企腳个樹尾就好，反正風搓時時有，只愛自家腳爪抓得在，管佢樹尾做風搓，就算樹尾分風搓橫乜毋怕，佢還有自家个翼胛好靠。

佢再緊看樹下兩個細人仔，水衣下載分風扯忒，伸著兩粒打眼个黃色頭那，在風雨肚捩捩轉，毋知參詳麼个，無結無煞。

老鵠婆个目珠肚還緊看，過了牛仔打一粒屁卵个時間，兩粒打眼个黃色頭那怕係參詳好勢，該抓轉來个半截水衣仔，在兩儕手項監⁴⁵過來監過去，乜毋知係麼儕交分麼儕，拿著該儕，就拿該半截黃色水衣仔包好書包仔，下後就看著一粒黃色頭那向窩湖行往轉，另一粒黃色頭那續等向本旦上課个方向，彎彎幹幹下山。

老鵠婆想，佢兜愛去哪無干厥事，樹尾个黃色水衣仔還在就好，就準備目珠眨起來寮一下。

毋過，老鵠婆又好奇心恁毋解，在這樹園做寶恁久咗，往擺就看佢兩儕打早共下出，到暗共下入，仰般這下嘎變做一儕出、一儕入？

風合雨緊來緊大，老鵓婆企高高看等行倒轉去个細人仔，真緊就轉到窩湖肚，打開其中一戶人家个門，入去屋肚咁……

…………※…………※…………※…………

該續等行往出該儕細人仔，打赤腳揸等包黃色水衣仔个書包仔，腰仔下个衫褲無水衣仔好遮雨，任在風吹雨打，落潦，佢乜無相干，頭那同書包仔無打溼就好，顛倒毋使顧這顧該乜較好行。

看佢孤栖孤栖，在風合雨个山路項跔等彎彎幹緊行，像一隻天地孤鷹。

在這高高个山頂樹園做竇个老鵓婆，一儕打獵恁久咁，想起自家乜係一隻孤鷹，好好怙怙思量起這隻山路項个細人仔，還同佢搵愁慮，這風合雨，細人仔行山路安全無？會崩山無？

老鵓婆想飛兼去摺佢做伴，毋過這下當當交北風，佢愛抓縋樹尾，係無，連佢恁樣个天頂老江湖，乜會老戲腳跌落戲棚下——在風搓肚墜到崩崗下受傷飛毋起，顛倒分老鼠蛇哥食忒。

該細人仔包等黃色个水衣仔个頭那，在風雨山路特別打眼，北風个風聲呼呼滾，一陣強一陣冗響無停，樹葉仔滿天蓬蓬飛，打到目珠微微擘毋開，一山个樹尾草尾，一陣橫一陣起，向南頷頷拜緊彎腰搭地，較脆个樹梗開始摺斷隨風傷人，連大樹筒都開始緊顫，強強會橫忒，老鵓婆看等佢行過樹下，好得無仰般。

又看等佢行過石壁，雨落到石頭落忒擲下山路項，好得無事。

再看等佢行過舊崩崗脣，雨水流流流流，將山路變細河壩，路面緊割緊深，又在路缺流下崩崗，打到下析山排屙出新个大崩崗，乜好得無事。

看等佢行到坑壠底，山溪水緊來緊大，老鵠婆嗶看著隔等山溪對門个山頂，歸排大樹共下蹴往下，壞蹄哩……

拍拍風老鵠婆企脚个大樹筒乜在風中從緊搖、緊斜，又轟隆轟隆橫下去，老鵠婆在陣風陣雨一瞞目个風縫肚，發出長長个一聲「hiu(咻)」，像箭恁遽起飛，射向黃色水衣包等个頭那頂，陣風又吹到佢打橫飛，佢細義調整翼胛轉隻幹，再一擺修正飛行路線，正飛過該黃色个頭那頂，黃色个頭那一下著驚，停下腳步臥頭看該鵠婆，看著老鵠婆順等山溪个對門山壁直直飛往上，堵堵閃過屙山个大樹，正知石頭合泥漿流往下，一瞞目就會將歸條溪水屯忒，還緊屙緊多，溪水沒忒坑壠底个山路，緊屯緊深……

今愛進？抑係愛退？進乜難、退乜難，佢毋敢企等再慢半下，跔等轉身向兼身个山排伸出長長个手腳，一擲著草頭就前蹶後箭跋上山，愛同緊屙緊賁个崩山泥漿比賽、乜愛同緊固緊多个山溪水走相逐，看麼儕跋較高……等到牛仔就食忒三到草个時間，佢還在樹園肚昂山尋毋著出路，佢記得厥爸講過，企越高看越遠，佢開始像山猴仔跋上大樹尾……

…………※…………※…………※…………

一開始兩個細人仔堵著風搓該下，一個選擇續等去學校讀書，一個倒轉窩湖肚个屋下。

該老鵠婆看著佢真緊就轉到窩湖肚，打開其中一戶人家个門，入去屋肚後，另一戶人聽著開門關門聲，跔等就打開門過來看。

「吓，恁大个風合雨，吾俵仔還毋知好轉，老猴牯，你乜遽遽跔去看仔，看有平安無？」

「唉，厥姆佢正好，俵仔恁戇，擎騰毋知轉肩，你也罵佢？」

「你心肝仰恁龜，恁樣罵俵仔。」

「老猴嫲，你無看佢既經在這著等蓑衣咩，笠嫲呢？就怕分風飛走咗？尋加一頂分佢啦！」

「遽遽！遽遽！笠嫲拿去，毋好挨哩～」

「好好，你佬著佢毋會愁喔，唉，佢仰會降一隻恁戇當个腩子！」

「你講麼个？」

「無啦，佢來去。」

.....※.....※.....※.....

在坑壩底閃厝山个細人仔，還在樹園肚跋上樹尋學校方向，風搓怕愛轉南咗，暫停下來哩，無風無雨，趕雲縫陣光陣暗，在樹尾四下看，看著哩，看著去學校个路，乜看著轉屋个路，還看著頭下該隻鷓鴣婆緊飛緊振，佢同鷓鴣婆攞手恁仔細，佢想，一定係鷓鴣婆救佢个。

續下來佢愛趕緊溜下大樹趕上課，昨晡日下課，先生還特別交代佢，今晡日愛早兜仔到，正愛溜下大樹，拍拍風又聽著厥爸在圍著溪水个崩山前，緊噉緊喊：

「吾腩子，仰會恁衰過，這崩山搵下來，喊佢愛仰般尋你？頭下看著對面山下有半截黃色个水衣仔，佬著你既經到山下，無想著逐過來到這位，正看著這厝山堆成恁大空个泥石駁，吾腩子～吾腩子哦～頭擺你正出世該下難帶，辛苦畜到三歲咗，還一身軟怠怠毋會行，佢為著愛你平安大，還揸等你帶等若姆，拿若八字共下翻山過崑(嶺)去街市去算命，算命師父有交代，你

命肚帶弓帶箭帶硬頸，還會剋自家，講愛去將軍廟認將軍做契爺，望得將軍收起你命肚个利箭，莫傷著自家。今你心心念念愛做將軍，乜愛等下二擺大咁正講，細細撚你就撚毋得大，撚到這下大來又恁戇，無想著你還係閃毋過你个命，吾心肝戇俵仔哦～」

「阿爸～阿爸～佢在這啦～佢無仰仔啦。」

「啊～你仰般跋到山排項个大樹尾做麼个？這隻孤盲子、夭壽子、絕代子，害佢噉到大細聲，心肝就愁戇一半，你愛同佢譴死係無？轉去皮擲較龜兜仔。」

「佢毋會戇乜毋會戇啦，佢聽著鵲婆叫再看著厝大山，就煞煞閃過崩山跋上山頂來，你先轉去同阿姆講佢無事情，佢還愛去讀書哦。」

「講毋好去就毋好去，莫分若姆愁壞肚腸，好轉！這隻不孝子，下來！」

「無愛，佢愛讀書，佢愛做『將軍』。」

「做麼个將軍啦，厝山會搥忒人，莫戇膽。」

「佢有戴等將軍綦啦，毋怕。」

講煞又看山勢，好得這片山勢日日行，知方向就安全，就順等去學校个山路方向蹴⁴⁶一路下，耳公還聽著厥爸喊个聲：

「這隻孤盲子、夭壽子、絕代子，毋聽話，腳脰根硬咁係無？翼生齊咁會飛咁係無？」

細人仔注意等腳底緊碾个石頭，無應，厥爸佬著佢搥氣⁴⁷無應，又毋盼得。

「喂～風搓跔等會回南，共樣會恁大風哦！路言通毋好透夜轉屋，先在學校儘採跔一夜，有聽著無？」

聲尾緊來緊細……

「有聽著啦～佢會細義，你先轉啦～」

佢盡聲咁喊，兩子爺个噉聲、罵聲、應聲、交代聲，聲聲在山壠个兩片山壁來回相應。

…………※…………※…………※…………

這下，尿桶角个蕭將軍腳長長，既經平平安安出到坑口，心肝正放下一粒分屙山嚇跣忒个膽石，佢半行半走去到學校，無赴著第一節國語課，連第二節課就既經讀一半，佢撻先生講明遲到个經過，又講無讀著「納爾遜將軍」當打爽。

「毋會打爽，佢請班長同你複習課文，毋過，你正係真正个『納爾遜將軍』。」

「先生先生！你毋好同蕭順興改外號啦，去喊該隻『納爾遜將軍』改名『英國个尿桶角蕭將軍』好無？！」

校長聽著蕭順興既經在風搓兩個天時，安全來到學校，乜走來關心，好得兩個學生仔就平安，還應承蕭順興，暗晡夜做得去校長屋下歇一暗晡。

「毋過先生，風搓正過，山路又塞忒，無法度帶你去吾屋下分吾爸吾姆請食雞髀雞卵哩，毋著！先生講過，毋好講『卵』，乜毋好講『屁卵』、『核卵』，係請食雞髀雞春啦。」

「哈哈，毋怕啦！佢既經知若爸若姆盡惜你咁，你就認真讀書，山路一定當遽就會耙開來，該央時還會再過去。」

禮拜六上課上到當晝十二點定定，先生講：

「好，班長，下課。」

「企起來、敬禮！」

「承蒙先生！」

細人仔一個一個行出教室，拍拍風又聽著一聲一聲相賽喊：

「『尿桶角个蕭將軍』有人尋你。」

蕭順興行出教室一看：

「啊！阿爸，阿媽！你兜仰會來學校？」

「本成先前就講好愛去若姑丈个，趕風搓無做事就湊等若媽順續來帶你共下去。」

「阿爸毋係講，無做無好食？」

「若爸啊，當愛面勢⁴⁸，自家毋敢講啦，佢講看著你在坑壩底為著閃厝山，跋上山排个大樹尾尋路，喊你轉又毋聽，顧你自家愛去學校讀書，害若爸啊又激⁴⁹又愁，等你蹴下到山路，佢乜黏時跋上山排在後尾跔等你行，出到坑口看你平安咗，正想煞煞轉來同佢報平安，一路又堵著風搓轉南，當多山樹本旦分北風向南搓橫，擲起半片根个樹頭，又分轉南个大風搓到橫轉北片，又擲起另半片根，結果就歸頭大樹根擲淨淨，橫到一路，若爸啊！在大樹筒底下疲爬極蹶鑽來鑽去正轉到屋，害佢聽著心肝就毋盼得。」

「係若媽放毋落心你啦，又訂訂拉等佢來學校，講愛帶你去若姑丈个歇幾暗晡，等山路整好你正轉山頂！佢就講咩，風搓正過，哪就狼離狼犁，愛煞煞整理，若媽就毋聽，硬硬愛趕等出來。」

「若爸啊，係死鴨仔硬嘴箝，一轉到屋就先去尋若衫褲，講愛拿來學校，帶你去若姑丈个歇。」

「若姆乜係，聽啊著就噉眇，還緊拂衫尾愛跔來。」

「咦！阿爸，你毋係逐擺就罵佢腩子，仰轉性咗，阿姆有講花蓼無？算來係麼儕較想去姑丈个過家寮，佢仰全聽毋識？抑係這係戲棚頂哪齣新个三腳採茶戲文，佢仰無看過呢？」

「這隻孤盲子，講个係麼个蠢話，無採若姆恁惜你。」

厥姆捕等佢惜，又指等正行出來个大人問蕭順興：

「這位就係若級任先生係無？」

「係啦，佢就係級任先生。」

「佢就係蕭順興厥爸啦，佢毋會講話，當承蒙先生相惜喔！這一息仔山產送先生，毋成東西，請莫棄嫌。吾俵仔講愛家庭訪問，這下看著先生咗，就毋使喊先生恁辛苦上山咗！」

「毋使恁細義啦，毋會辛苦，這係做先生个責任。」

「咦～阿爸，你這下無鬆爽係無？仰自家講自家毋會講話？同平常時無共樣哦？」

「大人講話細人仔有耳無嘴恬恬聽，阿爸當照常，莫大鑊官滾細鑊拋拋滾。」

「阿姆阿姆，阿爸係仰般啦！佢又無講差！」

「瞎(had~)！厥姆佢正好，這隻細鳥(jiau~)仔，無人刻怕毋會魂醒。」

「敗勢，這隻細人濫糝講話。今晡日風搓正過，一下北風，一下回南，一路就係橫下來个大樹，山路又塞忒，吾舖娘講，敗勢勞攪先生，故所愛來帶細人仔去親戚屋下歇一晡，特別來承蒙先生恁相惜喔。」

「校長既經吩咐蕭同學暗晡夜去厥屋下歇，有安排好咗，請毋使愁慮。」

「佢仔細喔，等下正帶佢去承蒙校長。」

「去姑丈个歇？該黃阿明無伴愛仰結煞？」

「厥爸乜有安排好咗，毋使愁。」

承蒙過先生後，又同先生共下去承蒙校長，先生轉手將厥爸个等路拿分校長：

「蕭先生講，這係愛承蒙校長个。」

「無……毋係……」

厥爸一下急，嘎結舌，佢出發該下無想著還愛拜訪校長，當尷尬。

「有啦。蕭先生當有誠意來承蒙校長照顧蕭順興啦！」

「好好，承蒙蕭先生佢好个等路，風搓天三不便，照顧細人仔係應當个，做級任先生正盡辛苦，這等路佢就借花獻佛，送分級任先生，佢仔細哦！」

這校長乜係在地人，看得識這人情世故。

「好……好……下二擺再過來承蒙校長。」

「借花？無花啊？」

「細人仔……恬恬啦……無……無看著若……若爸結舌……係無？」

「坐啦，你佢遠來學校，怕係嘴燥咗，先啖一杯水正講。」

「蕭順興，借花獻佛就係轉送一個誠意，分享分別人啦。」

「喔。佢知哩。毋過，吾爸罵佢一旦就毋識斷句，仰乜會結舌呢？」

「哈(had)！厥姆佢……算哩！」

到這下厥爸正講起蕭順興出世該下个故事：

.....※.....※.....※.....

十年前，在山肚一隻細窩湖肚，歇有上家下屋幾戶人家，該兩三年其中兩戶，一戶姓蕭，一戶姓黃，前後年討心白，姓蕭个年下仔先降一個俵仔，嬰兒仔瘦羴瘦羴又百日嗽⁵⁰。

o' nga' ~ o' nga' ~ o' nga' ~

「o' ~ o' ~，o' ~ o' ~，心肝仔哦，毋好再嗽哩」

o' nga' ~ o' nga' ~ o' nga' ~

「o' ~ o' ~，o' ~ o' ~，心肝仔哦，愛乖乖，天就愛光咁～」

o' nga' ~ o' nga' ~ o' nga' ~

「.....」

一暗晡搖啊搖拐啊拐，做阿姆个心肝強強會搖敲忒，嬰兒仔本本嗽毋會恬。

「唉～衰過哦！渡子無目睡，伯姆教你，去拿一張紅紙寫助念咒，保佑家中嬰兒仔好睡到天光。」

「有效係無？恁仔細哦，該愛仰般唸？」

「係愛貼到路口分過路君子掃唸个，就寫『天皇皇地皇皇，我家有個夜

啼郎，出外君子唸一遍，保證睡到大天光。」佢樣知無？」

「知係知咗，毋過佢兩公婆全係無過讀書个青瞑牛，毋識字呢。」

「去街市請漢書先生寫啊！」

過兩日，這山肚窩湖肚个路口就看著這張紅紙，過路人知，這係做人爺哀个艱苦，定著會搵手照唸一遍，過一駁仔嬰兒仔正慢慢日夜食睡照常，做爺哀个乜正較有目好睡。

又過兩年个年頭，上屋个黃屋心白乜降一個俅仔，看起來雖然矮佻矮佻，毋過噉聲當亮，乜當好帶，看得識，下二擺大咗定著同厥爸共樣，武頓車槌又砸礮又靈活。

毋過蕭屋這隻細人仔，辛苦畜到三歲咗，還一身軟怠怠，莫講學行，係連爬就還毋會，做阿姆个看等隔壁个細人仔既經攀籬吊壁，心肝歸日掛掛吊吊，思量這隻軟弱子，係做得折壽分幼子佢乜肯。

上屋个伯姆又教佢：

「去街市肚算命求化解。」

為著愛細人仔平安大，還兩公揸等佢翻山過崑(嶺)去街市去算命，正知這隻細人仔怕係命肚帶弓箭傷著自家，講山下哪位有一條大河壩，該伯公臂有一座伏波將軍廟。

「做得去求將軍，先將細人仔命肚个弓箭收起來，下二擺大咗正還細人仔，過求一條將軍綫來帶。」

當大紅色个綫索繫到細人仔个頸根項，做阿爺哀个正試著心肝肚个千斤擔頭有人搨核。佢乜輒輒同細人仔講，佢戴伏波將軍綫，到大咗正帶佢去脫綫，故所細人仔從細就想做將軍。

到八歲該當入學个時日，做爺哀个想著一個踏腳正足六歲⁵¹个軟弱子，愛喊佢攀過一座山，再到行到山下佢遠个學校——就係去求伏波將軍綫个就近仔，看班勢⁵²這隻細人仔怕行毋贏，將就慢一年入學，堵好同上屋黃屋該隻細一歲又年頭人⁵³黃阿明共下入學有伴。

就係樣，年頭年尾爭兩歲个兩個細人仔，就共下入學咗，一直到三年生還共班，一個高溜高溜白淨白淨，一個矮佻矮佻烏肉烏肉，同學看佢兩儕企共下就像城隍爺个七爺八爺，就謬佢安外號七爺將軍八爺將軍。

就係樣，身體無砸礮个蕭順興，正會一直想做將軍，想學伏波將軍係樣神勇，保護細人仔。

.....※.....※.....※.....

厥爸講忒蕭順興還細个故事，到愛轉該下，先生又交代佢：

「看你有幸福無，從細到大都有阿爸阿姆佢惜你，你係想做正經个將軍，毋單淨愛勇敢、堅耐，還愛煞猛讀加兜書，係無，就單淨做到尿桶角个蕭將軍定定，你平日行路無時間好讀書，到放寮日就愛認真哦！」

「放寮日還較愛搨手做事咧，吾爸講，係無搨做，麼个屁卵就無好食。」

厥爸一聽俾仔恁孤盲，緊攞佢落潰，就細細聲仔咄佢：

「這隻不受教，怙怙啦，無搵做兜仔事，望土地有兜仔出息⁵⁴，還想嘅飯？食尿你就無！腩子得似。」

「係哪，一日無講腩，食飯就毋落脰，恁樣講話个阿爸，毋正像吾爸！」

先生揸等嘴⁵⁵毋敢應，校長詐意⁵⁶面逼逼仔⁵⁷，像係責備先生，無認真推行「說國語運動」。其實佢乜係忍等，心肝肚早就噓斷脰、笑斷腸⁵⁸：

「像種。」

註解

1. 平洋：平原。
2. 禾黃米白：金黃稻浪，白米豐收。
3. 同：華語的「和」，我和你；海陸的「摻」，偈摻你；四縣「同」，偈同你。
4. 流流流流：不斷流動的水。
5. 級任先生：班導師舊稱。
6. 家庭宿題：家庭作業。
7. 相賽：賽，音coi；爭先恐後的。
8. 紅咚咚：紅通通。
9. 紅梗同青梗：夕陽西下海面下方後，陽光被前方雲朵擋住，雲的影子拉長，在紅色晚霞背景裡呈現灰藍色光柱，透過雲朵縫的陽光則呈現橘紅色亮光柱，好像孔雀開屏。
10. 放勢牯：盡全力。
11. 開：音hia'；張開。
12. 年尾人：小孩子入學年紀劃分除了足六歲外，還看出生月分，八月之前的算年頭人，六歲足當年度入學，九月之後的算年尾人，六歲足次年度入學。
13. 鼓扛等來打：合作無間。
14. 撓：音neu'，在胳肢窩下或腰部等身上敏感處抓癢。
15. 牛草：牛要吃的蘆葦牧草，也有稱為乾筍。
16. 茶崗：從前山路上每隔約一公里大約走累的路程，就會尋找一小塊較平坦處，擺放大水缸裝著附近人家義務煮好的冷開水，供過路人止渴，還會擺放石頭、木棍或竹筒，可供稍坐休息。
17. 記毋擎亾：擎亾，音qiu' qib；無法全部記完整。
18. 生事：辛苦的體力活。
19. 禮拜六上半日課：許多年前那時星期休一天半，星期六還要上半天課。

20. 打頓屈：小孩子耍脾氣不理人。
21. 雞春：老一輩對雞蛋的另一種稱呼。雞春、鴨春。
22. 食到會尋尾：吃到意猶未竟。
23. 歇 hied`：暫住；歇 hed：長住。
24. 昂山：昂，音ngongˇ；精神恍惚迷路。
25. 撞差路：亂走亂闖走錯路。
26. 水衣仔：雨衣。
27. 磨疏：音mo so；做事慢吞吞。
28. 老郎：老成有經驗。
29. laˇ ji lo`：收音機。
30. 接泥毋洗手：感情非常好，毫不避諱，如同玩泥巴不用洗手，對泥巴沾手也毫不介意。
31. 過坳：經過山路轉彎處，或上坡下坡的山凹處，形容路途蜿蜒遙遠。若是沒有一路說說笑笑那要怎樣才能熬過蜿蜒遙遠的路途呢？
32. 咚咚咚咚：音dungˇ dung´ dung` dung`；有一句沒一句，一直聊不停。
33. 駁嘴古：鬥嘴。
34. 杓著：音diag cog；按下電燈開關把燈點亮。
35. 打暗摸：摸黑。
36. 崑頂：音gien；山頂上、山脊線。
37. 的對：完全準確，沒有偏差。
38. 風合雨：大風兼大雨。
39. 準準：完全準確，沒有偏差。
40. 涿狗仔：落水狗。
41. 濟事：頭路。
42. 風吹牛鼻頭：最迎風的地形位置。

43. 回南：颱風逆時針旋轉，先以北風接近，再以南風離開，北風轉南風時，會有轉換空檔，無風無雨，就是颱風眼。
44. 整：音zang`；修理。
45. 監：音gam`；勉強別人。
46. 蹴：音qio；在斜坡上，半坐半滑往下溜下去。
47. 搨氣：堵氣。
48. 面勢：面子。
49. 激：音gid`；生氣，同「譴」，音kien`。
50. 百日嗽：剛出生的嬰兒，還未適應母親子宮外的明亮環境，常常日夜顛倒，白天睡晚上哭，經常要兩三個月才能和大人日夜同步，這期間大人晚上為了哄嬰孩，沒得好好睡一覺，稱為百日哭。
51. 踏腳正足六歲：民間習慣使用包還年頭年尾的虛歲，但有時也需要衡量實際歲數，就會特別加上踏腳實歲，比如說明老人家歲數時，也常用到。
52. 班勢：觀察整體局勢。
53. 年頭人：小孩子入學年紀劃分除了足六歲外，還看出生月分，八月之前的算年頭人，六歲足當年度入學，九月之後的算年尾人，六歲足次年度入學。
54. 出息：生產作物有收入。
55. 揞等嘴：用手掩遮嘴。
56. 詐意：假裝。
57. 面逼逼仔：生氣，臉色凝重。
58. 噓斷脰、笑斷腸：噓，音nag`；笑的另一種說法。脰，音kin`；胃。笑到肚子痛、胃痛、腸子痙攣、抽筋。